



STINAPA TA INFORMA

TIPONAN DI RIKESA?

Bon, e aña aki pues ta aña di biodiversidat. Kiko esei kemen pa Boneiru? Ora ta papia di biodiversidat kemen e variedat den naturalesa. Mas tantu di tipo di animal ku tin, ta mas mihó ta. Pues e atenshon ta bai mas tantu na espésienan di bestia i mata ku ta bou di menasa di ekstinsjon. Nos mester protehá eseiinan pa evitá ku nan ta disparsé for di nos isla. E peliger di disparsé no ta imaginario. Djis pensa riba e lora na Aruba. E último lora liber di Aruba a disparsé mas ku mitar siglo pasá kaba dor ku a traha kas na su lugá di biba i kome, i dor ku kunukeronan tabata tira nan mata pasobra nan tabata kome nan frutanan. Afortunadamente ta parse ku e loranan di Boneiru si ta bayendo bon. E karkó tambe a pasa den tempunan hopi difísil. Tin indikashon ku nan tambe ta rekuperando un tiki último añanan. Esei ta dor di e kontròl mas severo di STINAPA den Lac. Kref si bo ta mira hopi ménos ku ántes. Gramèl tambe. Nan kantidat ta bahando tambe. Di sierto espésie di animal ta mas difísil pa bisa kon nan ta bayendo. Tuma por ehèmpel e kangreu (di tera). Ki dia bo a wak unu pa último biaha? I bo tabata mira nan ku mas regularidat ántes? Anto e Pal'i sia? Bo ta mira nan ainda. Sigur sigur. En partikular kant'i kaminda di Playa pa Rincon nan ta hala bo atenshon. Pero eseiinan ta den mayoria palunan mas bieu. Unda bo a mira un Pal'i sia yòn? Tin biaha ta haña otro espésie nobo. Kasi semper ta nos mes a sòru p'esei. Pero no ta tur ora un espésie nobo ta motibu di alegria. E álua òf sentebibu, ta bin originalmente di e área di Mar Mediteráneo den Europa. E mata ei a establese su mes sin problema riba nos isla. Ta un mata milagroso ku nos tin hopi uso p'e, i ku kua naturalesa ta kontentu tambe. E blenchi por ehèmpel, ta stima su floran un mundu. Pero di otro banda e "Lionfish", nos atkisishon mas resien, si ta motibu di preukupashon. Un solo ehemplar por devorá 80% di tur piská hóben den su serkania. Kabritunan ta akinan pa hopi mas tempu kaba. E promé Spañónan a bin ku nan kaba. Nos a kustumbrá asina hopi ku nan kaba ku nos a kuminsá kere ku nan ta parti di nos naturalesa. Pero nan hamber inkansabel por ser kompará ku esun di e "Lionfish" riba e ref di koral. Kabritu ta kome kasi tur mata ku ta bin nan dilanti. Tambe Pal'i sia hóben! Pues tin sierto espésie ku nos ta preferá di no mira den nos naturalesa.

Skirbí pa V. van Baronie

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESAS



Traha huntu na un desaroyo duradero pa Boneiru